



Inatsisartunut ilaasortaq Emanuel Nûko, Naleraq
/Maani

**Tasiilami nunaqarfiinilu inissialiortiterneq pillugu § 37 naapertorlugu
apeqquteqaammut 2022-032-imut akissut**

08-02-2022
Sags nr.: 2022 - 2594
ID. nr. 72777561

Asasara Emanuel Nûko

Inatsisartut suleriaasianni § 37 naapertorlugu Tasiilami nunaqarfiinilu inissialiortiterneq pillugu Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matuma kinguliani ataasiakkaarlugit allanneqarput, akissummillu malitseqarlutik.

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
www.naalakkersuisut.gl

Aallarniutigalugu matuma kinguliani erseqqissaataasusaaq sanaartornermi akinut missingiummut sunniuteqartussaavoq, aammalu annertunerusumik paasiniaaffiusariaqartunut naatsorsuiffiusariaqartunullu tunngatillugu apeqqutinut 1-7-imut akissuteqaatini sooq taakkununga akit taaneqarnerini tamatuma eqqarsaatigineqannginnera erseqqissaatigineqassaaq:

- Namminersorlutik Oqartussat ukiorpaalunni Tunumi inissialiortitersimangillat, taamaattumillu akit matuma kinguliani taaneqartut Kitaani nunaqarfinni isorliunerusunilu inissialiortiterneri misilittakkanik tunngaveqarput.
 - Tasiilaq: Inissiaq marlunnik initalik 3,7 mio. koruuninut aamma inissiaq pingasunik initalik 4,0 mio. koruuninut missiliorneqarput.
 - Nunaqarfiit: Inissiaq marlunnik initalik 3,2 mio. koruuninut aamma inissiaq pingasunik initalik 3,7 mio. koruuninut missiliorneqarput.

Tasiilami akit missiliukkat qaffasinnerunerinut imermut kuuffeqarfimmullu attaviliinissat ilanngunneqarneri peqqutaavoq, kiisalu nunaqarfinni imermut tankiliinerit imermillu errortuutikumik kuutsitsisarnerit ilanngunneqarlutik.

- Tunumi Entreprenørit amerlanngillat, tamannalu suliariumannittussarsiuussineri akinut sunniuteqarsinnaavoq, unammilleqatigiinnissamut kajumissuseq amigaataasussaammat, imaluunniit tunngavissat allat amigaataasussaammata, soorlu illoqarfiup avataaniit entreprenørit pilersitsinissamut aningaasartuutissaat matussuserneqartussaammata. Unammilleqatigiinnerup amigaataanerani akit Namminersorlutik Oqartussat kitaani misilittagaannut naleqqiullutik nikingangaatsiarnerinik kinguneqarsinnaavoq.
- Illut assigiinnik ilusillit arlallit suliassaassappata, suliassanut annertusunut neqeroortitsinissaaq aningaasaqarnikkut pissarsiviusinnaassasoq ilimanarpoq. Tamatumunnga assigiinnik suliaqaqqittarnermi, taamaallunilu piffissamik annerusumik pissarsisarnermi annaasaqaataasinnaasullu eqqarsaatigalugit entreprenørit suliaqartut iluanaaruteqarnissaat peqqutaavoq. Kisiannili aamma

suliassamik, inissianik ukiut arlerlugit sanaartormik kinguneqartussamik, taamaalillunilu entreprenørit ukiut arlallit siumut pilersaarusiorfigisinnaasaannik suliaqartoqarneratigut iluanaaruteqartoqarnissaa naatsorsuutigineqarpoq.

- Sanaartugassamut akinik naatsorsuinermit allanngorarfiusinnaasut arlallit ilanngunneqartarput, taakkunungalu pingaartumik nunaminertani sanaartorfiusussani sanaartorfissagissaanissat erseqqissaatigineqassapput. Nunaminertamik aalajangersimasumik piareersimasoqartinnagu, aningaasartuutissat taakku missiliorlugit naatsorsornissaat ajornartarpoq. Taakku saniatigut nassiussinermut akit, atortut akissarsiallu iluarsiiissutaat, sanaartorfimmik ingerlatsineq pilersuinerlu, inissiigallarnermut aningaasartuutit, ukiuuneranum piareersaatit, sanaartorfimmi aqutsineq, suliamut malinnaanerit il.il. ilaatinneqartarput. Naggataasumik atortussat akii qaffassinnaapput, taakkulu piffissamit ataatsimiit allamut nikerarsinnaapput, ukiunilu kingullerni qaffakkiartorsimallutik.

Akit matuma kinguliani akissuteqaatini paasissutissiissutigineqarput, taamaattumillu taamaallaat akinut assersuutaasinnaasutut isigineqarsinnaapput, Tunumi inissialortiternermut missingersuutivittut isigineqarsinnaanatik. Akinut missingersuutinik naatsorsuinermit matuma siuliani taaneqartut paasineqartariaqarput, taamaattumillu annertunerusumik paasiniaanissaq naatsorsuinissarlu, Inatsiartut Suleriaasianni § 37 naapertorlugu apeqqummut ilaatinneqarsinnaanngitsoq pisariaqartinneqartussaavoq. Tamatuma saniatigut akissavioq aatsaat suliariumannittussarsiuussinermi aalajangerneqarsinnaavoq.

Apeqqu 1. Tasiilami inissianik marlunnik initalinnik ukiumut arfineq marlunnik sanasoqaraluarpat qanoq naleqassava?

Akissut: Aallarniinermit tunuarsimaarfittut taasat ilanngullugit akit aallaavigineqartut tamarmiusut tunngavigalugit ukiumut missiliukkat 25,9 mio. koruunit missaanniipput.

Apeqqu 2. Tasiilami inissianik pingasunik initalinnik ukiumut arfineq pingasunik sanasoqaraluarpat qanoq naleqassava?

Akissut: Aallarniinermit tunuarsimaarfittut taasat ilanngullugit akit aallaavigineqartut tamarmiusut tunngavigalugit ukiumut missiliukkat 32,0 mio. koruunit missaanniipput.

Apeqqu 3. Taakkulu taaneqartut ukiuni qulini inissiat 150-it pilersinneqaraluarpata qanoq naleqassappat?

Akissut: Aallarniinermit tunuarsimaarfittut taasat ilanngullugit akit aallaavigineqartut tamarmiusut tunngavigalugit inissiat marlunnik initalit 150-it Tasiilami sananeqarnissaannut missiliukkat 555,0 mio. koruunit missaanniipput.

Aallarniinermit tunuarsimaarfittut taasat ilanngullugit akit aallaavigineqartut tamarmiusut tunngavigalugit inissiat pingasunik initalit 150-it Tasiilami sananeqarnissaannut missiliukkat 600,0 mio. koruunit missaanniipput.

Apeqqu 4. Kuummiini, Kulusumi inissianik marlunnik initalinnik ukiumut ataaseq sananeqarpat qanoq naleqassava?

Akissut: Aallarniinermi tunuarsimaarfittut taasat ilanngullugit akit aallaavigineqartut tamarmiusut tunngavigalugit sumiiffimmut ataatsimut ukiumut missiliukkat 3,2 mio. koruunit missaanniipput.

Apeqqu 5. Kuummiini, Kulusumi inissianik pingasunik initalinnik ukiumut marluk sananeqarpata qanoq naleqassava?

Akissut: Aallarniinermi tunuarsimaarfittut taasat ilanngullugit akit aallaavigineqartut tamarmiusut tunngavigalugit sumiiffimmut ataatsimut ukiumut missiliukkat 7,4 mio. koruunit missaanniipput.

Apeqqu 6. Sermiligaami marlunnik initalik aamma pingasunik initalik ukiumut ataaseq sananeqarpat qanoq naleqassava?

Akissut:

Aallarniinermi tunuarsimaarfittut taasat ilanngullugit akit aallaavigineqartut tamarmiusut tunngavigalugit inissiamut marlunnut initalimmut ataatsimut ukiumut missiliukkat 3,2 mio. koruunit missaanniipput.

Aallarniinermi tunuarsimaarfittut taasat ilanngullugit akit aallaavigineqartut tamarmiusut tunngavigalugit inissiamut pingasunik initalimmut ataatsimut ukiumut missiliukkat 3,7 mio. koruunit missaanniipput.

Apeqqu 7. Tiilerilaami, lsertumi inissianik marlunnik initalit ukiumut ataatsit suliarineqarpata qanoq naleqassava?

Akissut: Aallarniinermi tunuarsimaarfittut taasat ilanngullugit akit aallaavigineqartut tamarmiusut tunngavigalugit sumiiffimmut ataatsimut 3,2 mio. koruunit missaanniissapput.

Neriuppunga qulaani allaqqasuni apeqquteqaatitit akineqartut.

Inussiarnersumik inuulluaqqusillunga


Mariane Paviasen